

四庫全書

史部

欽定四庫全書

史部

湖廣通志卷五十四

詳校官監察御史臣陳化龍

檢討臣德生覆勘

總校官知縣臣繆琪

校對官主事臣沈清藻

謄錄監生臣章玠

欽定四庫全書

湖廣通志卷五十四

人物志 行業

襄陽府

漢劉縯後漢書齊武王傳字伯升世祖長兄初寓棗陽之舂陵性剛毅慷慨有大節王莽篡漢常憤憤懷恢復志起兵舂陵率新市平林兵與王匡陳牧等合軍敗莽兵更始立拜大司徒封漢信侯後為更始所

害世祖即位追封齊武王

習融襄陽耆舊傳襄陽人有德行不仕

習郁襄陽耆舊傳融子字文通為黃門侍郎名山記
郁從光武幸黎丘與光武俱夢蘓嶺山神後封襄陽
侯使立蘓山神祠刻二石鹿夾祠前人遂謂之鹿門
山府城南有習家池郁所鑿也

陰子方後漢書陰識傳齊管仲七世孫修適楚為陰
大夫因氏焉秦漢之際家新野陰興傳宣帝時子方

至孝有仁恩臘日辰炊竈神形見家有黃羊因以祀之自後暴富嘗言子孫必强大至識三世遂繁昌

陰識子方三世孫後漢書列傳字次伯劉伯升起兵識率子弟宗族賓客千餘人往伯升以為校尉建武元年光武遣使迎陰貴人並徵識以為騎都尉封陰鄉侯顯宗立為太子識守執金吾帝每巡郡國識留鎮京師委以禁兵雖極言正議與賓客語未嘗及國事帝敬重之卒謚貞侯子躬嗣

陰興後漢書陰識傳興字君陵識弟為黃門侍郎光武平定郡國每從出入常持小蓋障翳風雨帝所幸之處輒先入清宮甚見親信好施接賓門無俠客與同郡張宗上谷鮮于裛不相好知其有用猶稱所長而達之與友人張汜杜禽厚善以為華而少實但私之以財終不為言帝欲封之固讓拜衛尉尉輔導太子帝疾受顧命會瘳欲以代吳漢為大司馬興固讓曰臣不敢惜身誠恐虧損聖德不可苟冒至誠發中感

動左右卒進謚異侯

劉興後漢書齊武王縝傳興建武二年封為魯王十五年試守緱氏令有明畧善聽訟甚得民稱遷弘農太守亦有善政視事四年上疏乞骸骨徵還京師奉朝請二十七年始就國明年徙為北海王顯宗器重興每有異政輒乘驛問焉

劉睦後漢書齊武王縝傳興子少好學博通書傳光武愛之數被延納明帝在東宮入侍諷誦出則執轡

性謙恭好士交結名儒宿德聲價益廣能屬文又善史書及寢疾帝給驛馬命作草書尺牘十首

劉良後漢書趙孝王傳字次伯光武叔父平帝時舉孝廉為蕭令光武兄弟少孤良撫循甚篤建武二年封廣陽王徙趙王始就國

劉敞後漢書城陽恭王祉傳敞春陵侯仁子謙儉好義盡推父時金寶財產與昆弟荊州刺史上其義行拜廬江都尉後追謚康侯

劉祉後漢書城陽恭王傳字巨伯敞子行淳厚宗室
皆敬之光武起兵祉兄弟相率從軍光武即位封為
城陽王賜乘輿御物車駕衣服卒年四十三謚恭王
劉賜後漢書安成孝侯傳字子琴光武族兄少孤伯
升起兵賜從攻擊諸縣更始立封廣漢侯更始欲令
親近大將徇河北未知所使賜言諸家子獨有文叔
可用光武即位嘉賜忠封安成侯以賜有恩信賜予
特異輒與故舊無有遺積帝為營冢堂起祠廟置吏

卒如春陵孝侯

劉嘉後漢書順陽懷侯傳字孝孫光武族兄與伯升
俱學長安習尚書春秋及義兵起到洛陽從征伐拜
為千乘太守

樊重後漢書樊宏傳重字君雲湖陽人周仲山甫封
樊因氏焉世善農稼重性溫厚有法度三世共財子
孫朝夕禮敬常若公家管理產業貨至巨萬賑贍宗
族恩加鄉閭外孫何氏兄弟爭財以田二頃解其忿

訟縣中稱美推為三老年八十餘終世祖即位南祠
章陵過祭其墓謚壽張敬侯為立廟

樊宏後漢書列傳字靡卿重子少有志行王莽末劉
伯升與族兄賜攻湖陽不下賜女弟為宏妻湖陽帥
收繫宏妻子令出譬伯升因畱不返更始以宏為將
辭歸與宗族親屬立營塹自守歸者千餘家赤眉掠
唐子鄉欲攻宏營宏遣人持牛酒勞遺皆曰樊君素
善何心攻之引兵去世祖即位拜光祿大夫封長羅

侯卒謚恭侯車駕親送葬子儵嗣

樊儵後漢書樊宏傳儵字長魚謹約有父風事後母至孝母卒哀思過禮世祖常遣中黃門朝暮送饘粥服闋就侍中丁恭受公羊嚴氏春秋建武中諸王招引賓客以儵外戚爭延致之而儵清靜自保無所交結及沛王輔事發貴戚子弟多見收儵以不豫得免永平元年拜長水校尉北海周澤琅瑯承宮並海內大儒儵皆致之於朝又議刑辟宜須秋月以順時氣

顯宗並從之二年封燕侯其後弟鮪為子常求楚王
英女敬鄉公主儵聞而止之鮪不從十年儵卒謚哀
侯及楚王事發覺帝追念儵謹恪又聞其止鮪婚事
故諸子得不坐

樊準後漢書樊宏傳準字幼陵宏族曾孫少勵志行
以父產數百萬讓兄孤子和帝幸南陽準為郡功曹
召見拜郎中後補尚書郎永平初連年水旱準上疏
宜遣使者與二千石隨事消息留富人守舊土轉尤

貧者過所衣食太后從之悉以公田賦與貧人即擢
準光祿大夫後使冀州到部開倉廩食流人還拜鉅
鹿太守時饑荒之餘人庶流迸準課農桑施方畧朞
年間穀粟豐稔數十倍郡縣以安轉河內太守羌屢
入郡界將兵討逐威名大行為光祿勳卒

馮魴後漢書列傳字孝孫湖陽人王莽末魴聚賓客
招豪傑作營壑以待所歸建武三年徵詣行在見於
雲臺拜虞令以威信稱遷邾令賊延褒等圍縣魴力

戰連日城陷遁見帝帝馳救潁川按行鬪處嘉之曰
此健令也褒等聞帝至自髡剔負鉄鎖請罪詔悉以
褒等還魴誅之魴一切相赦聽各反農桑為令作耳
目自是縣界清淨

岑暉後漢書列傳字公孝棘陽人有高才與郭泰輩
相友善李膺稱其有幹國器雖在閭里慨然有董正
天下之志太守成瑨請為功曹褒善糾違肅清朝府
時語曰南陽太守岑公孝弘農成瑨但坐嘯瑨死遂

不仕

郭丹後漢書列傳字少卿穰人七歲而孤事後母小心孝順母憐愛之從師入函谷關乃慨然歎曰丹不乘使者車終不出關至京師為都講諸儒咸敬重之更始二年舉丹賢能徵為諫議大夫持節歸果乘高車出關如其志焉更始敗諸將悉歸光武獲封爵丹獨保平氏不下為更始發喪盡哀建武中吳漢辟舉高第遷并州牧有清平稱永平三年代李訢為司徒

廉直公正與郭汲張湛齊名五年卒於家年八十七
丹出典州郡入為三公而家無遺產子孫因匱後顯
宗訪求其嗣長子宇官至常山太守次子濟趙相

何顯後漢書列傳字伯求襄鄉人少與郭林宗賈偉
節相友善顯名太學陳蕃李膺坐黨錮顯以交盟為
宦者所陷乃易姓名亡匿汝南間袁紹慕之私與往
來值黨禍起天下多懼其難顯常入洛陽從紹商榷
廣設權計全免者甚衆黨錮解辟顯司空府每三府

集議多推顯長董卓秉政逼顯為長史辭不受乃與
司空荀爽司徒王允等共謀誅卓為卓所繫憂憤卒
黃承彥襄陽人襄陽記彥高爽開朗為沔南名士謂
諸葛亮曰聞君擇婦身有醜女而才堪相配亮許諾
即載送之時人以為笑為之諺曰莫作孔明擇婦止
得阿承醜女

蜀漢廖化蜀志宗預傳化字元儉襄陽人為關羽主
簿羽敗屬吳思歸蜀乃詐死因攜持老母晝夜西行

會先主東征遇之秭歸大悅命為宜都太守後累官
并州刺史封中鄉侯以果烈稱咸熙中內徙洛陽道
卒

習貞字文祥襄陽人隨先主入蜀歷官至廣漢太守
襄陽記貞風流善譚論名亞龐統而在馬良之右子
忠亦有名官至尚書郎忠子隆為步兵校尉掌校秘
書

楊儀蜀志列傳字威公襄陽人初辟為主簿尋為功

曹先主與論軍國大計悅之因辟為左將軍兵曹掾
歷陟尚書諸葛亮舉為參軍署府事亮數出軍儀常
規畫分部籌度糧穀不稽思慮斯須便了隨亮出屯
谷口亮卒儀領軍還自以功大宜代亮秉政見蔣琬
為尚書令憤形聲色費禕密表之廢為民自殺

楊顥襄陽記字子昭儀宗人入蜀為巴陵太守丞相
諸葛亮主簿亮嘗自校簿書顥諫曰為治有體上下不
可相侵古人坐而論道謂之三公作而行之謂之士

大夫今明公躬校簿書流汗竟日不已勞乎亮謝之
後為東曹典選舉及卒亮垂涕三日

蔡瑁明一統志字德珪襄陽人性豪自喜與南郡蒯
越共為劉表謀主有應變之才

蒯越魏志劉表傳裴松之注傳子曰越蒯通之後也
字異度中廬人深中足智魁傑有雄姿何進辟為東
曹掾勸進誅閻宦進猶豫不決越知其必敗求出為
汝陽令與兄良佐劉表定荊州詔拜章陵太守封樊

亭侯曹操下荊州與荀彧書不喜得荊州喜得蒯異
度耳建安十九年卒

魏延蜀志列傳字文長義陽人以部曲隨先主入蜀
數有戰功遷牙門將軍先主為漢中王拔延領漢中
太守一軍盡驚先主問延曰委卿重任卿云何延曰
若操舉天下而來請為大王拒之偏將十萬之衆至
請為大王吞之衆咸壯其言延每隨亮出師輒欲請
兵萬人與亮異道會於潼關如韓信故事亮不許延

常謂亮為怯歎恨已才用之不盡亮出北谷口延為
先鋒亮卒楊儀等欲案亮成規引軍還延怒率所領
先歸至南谷逆擊儀等士眾知屈在延莫為用命奔
漢中儀遣馬岱追斬之

習溫襄陽人珍之子耆舊傳溫識度廣大厯長沙武
昌太守選曹尚書廣州刺史徙容朝位三十年不立
名跡不結權豪飲酒一石乃醉有別業在洛上每休
沐常宴其中長子宇為執法郎曾取急趨車乘導從

甚盛溫怒杖責之曰吾聞生於亂世貴而能貧始可
無患况復以侈靡競乎

董恢襄陽記字休緒襄陽人事先主為宣信中郎費
禕使吳恢副之孫權問楊儀魏延牧豎小人禕不能
即荅恢曰可速言今方掃除強寇混一區夏功
以才成業由才廣若舍此不任防其後患是猶備有
風波而逆廢舟楫非長計也權大笑諸葛亮聞之以
為知言辟為丞相府屬遷巴郡太守

馬謖蜀志馬良傳謖字幼常襄陽人良之弟以荊州
從事隨先主入蜀歷越雋太守才器過人好論軍計
亮深加器異先主臨薨謂亮曰馬謖言過其實君其
察之亮以謖為參軍出軍祁山謖統大衆在前與魏
將張郃戰於街亭為郃所破謖下獄物故亮為之流
涕

殷觀字孔休宜城人蜀志先主傳孫權遣使約昭烈
共取蜀或謂宜聽之荊州主簿殷觀進曰若為吳先

驅進未能克蜀退為權所乘則事去矣今但可贊其
伐蜀而自說新據諸郡未可輕動吳必不敢越我而
獨取蜀如此進退之計可以收吳蜀之利先主從之
遷觀為別駕從事

向充襄陽人襄陽記魏咸熙元年鎮南將軍衛瓘至
成都得璧玉印各一枚文似成信字魏人宣示百官
藏於相國府充聞之曰吾聞譙周言先帝諱備其訓
具也後主諱禪其訓授也如言劉已具矣當授與人

也今中撫軍名炎而漢年極於炎興瑞出成都而藏
之於相國府此殆天意也是歲拜充為梓潼太守明
年十二月而晉武帝即尊位炎興於是乎微焉

鄧艾魏志列傳字士載棘陽人每見高山大澤輒規
度指畫軍營處所司馬宣王竒之辟為掾遷尚書郎
正始二年開廣漕渠每東南有事大軍汎舟而下達
於江淮有資儲而無水害艾所建也出參征西軍事
遷南安太守嘉平元年與征西將軍郭淮拒蜀姜維

賜爵關內侯加討寇將軍後遷城陽太守司馬景王
輔政遷汝南太守所在荒野開闢軍民並豐遷兗州
刺史進封方城亭侯以破文欽等功進封鄉侯行安
西將軍與姜維戰於段谷大破之進封鄧侯景元四
年艾自陰平道行無人之地七百餘里山高谷深至
為艱險艾以氍自裹推轉而下將士皆攀木緣崖魚
貫而進後主詣軍門降詔以為太尉增邑二萬戶鍾
會等讒之檻車徵至成都魏瓘等過於綿竹西斬之

泰始三年議郎段灼上疏理其寃帝愍之以嫡孫朗
為郎中

晉羅憲晉書列傳字令則襄陽人父蒙為蜀廣漢太
守憲年十三即知名性方亮嚴整輕財好施仕蜀為
太子舍人以不附黃皓左遷巴東太守守永安城成
都敗邊江長吏皆棄城走憲斬亂者一人百姓乃安
劉禪降憲率所統哭臨於都亭三日後歸晉吳遣陸
抗等圍城拒守經年救援不至城中疫作或勸出奔

憲曰夫為人主百姓所仰況不能存急而棄之君子不為也畢命於此矣會荊州刺史胡烈救之抗退加憲臨江將軍領武陵太守泰始六年卒追封西鄂侯謚曰烈子襲厯宦至廣漢太守兄子尚益州刺史羅友晉陽秋字它仁襄陽人少好學不持節檢始仕荊州後在桓溫府以家貧乞祿溫雖以才學遇之而謂其誕肆未用後同府人有得郡者溫為席送別友至獨晚溫問之友荅曰中途逢一鬼大見椰榆云我

只見汝送人作郡不見人送汝作郡始怖終慙不覺
成淹緩之罪温心頗愧後以為襄陽太守累遷廣益
二州刺史在藩舉其宏綱不存小察甚為民吏所安
悅薨於益州

南北朝柳元景南史列傳字孝仁襄陽人少便弓馬
數隨父伐蠻以勇稱為江夏王義恭參軍世祖西鎮
襄陽義恭又以為隨郡太守朝廷大舉北伐加元景
建威將軍總統羣帥引諸軍深入攻弘農進陝入函

谷北虜悉平太祖令班師南歸於樊城立府舍元景率所領居之除為襄陽太守及魯爽向虎牢復使元景再出北討威著境外世祖入討元凶以為諮議參軍領中兵加冠軍將軍配萬人為前鋒凡十三軍皆隸焉時義軍至蕪湖元景倍道兼行大破賊兵於淮賊將並來歸順上即位封曲江縣公孝建元年臧質義宣並反上使元景進屯姑熟設奇制勝所向克捷大明二年封巴東郡公坐事誅太宗即位追贈爵秩

謚忠烈

柳世隆南史柳元景傳隆字彥緒元景姪幼孤挺立
不與衆同涉獵文史音吐溫潤齊武帝入朝高帝以
夏口兵衝要地當須文武兼資人委以後事武帝遂
舉世隆自代轉江夏內史行郢州事沈攸之反力討
平之徵為侍中出為吳郡太守旋以母憂歸居喪寒
不衣絮高帝踐祚起為南豫州刺史加都督進爵為
公後蠻叛以本官總督衆軍仍為湘州刺史加都督

以方畧平蠻累官尚書令世隆文武全才學行並至
少立功名晚專以談藝自尚不干世務甚獲衆譽永
明九年卒贈司空謚忠武所著龜經祕要二卷子二
長悅字文殊位中書郎早卒謚恭次悛字文通梁尚
書左僕射謚穆

柳愷南史柳元景傳愷字文深與王峻齊名俱為中
庶子時人號為柳王後為鎮北始興王長史王移鎮
益州復請為鎮西長史蜀郡太守為政廉恪益部懷

之

柳偃南史柳元景傳偃字彥游年十二梁武帝引見
詔問讀何書對曰尚書問有何美句對曰德惟善政
政在養民衆咸異之

柳慶遠南史柳元景傳遠字文和世隆從弟事齊為
襄陽令梁武帝問杜暉求州綱紀暉舉慶遠因辟為
別駕及帝即位以帷幄功封雲杜侯出為雍州刺史
加都督厲清節士庶懷之卒謚忠惠子津襲為雲杜

侯

柳遐北史列傳字子昇幼爽邁好文學動合規矩世父慶遠特加器異年十二謁梁西昌侯深藻風儀端肅進止詳雅深藻美之廬陵王續為雍州刺史辟為主簿起家邵陵王綸府法曹叅軍除工部郎僕射謝舉引遐與語嘉嘆曰江漢英靈見於此矣後仕後周為持節驃騎大將軍開府儀同三司霍州刺史導民務以德不用命者乃微加貶異其下感化不復為過

天和中卒年七十二遐性孝為主簿時父卒於揚州
遐自襄陽奔喪中流遇風舟人危懼遐抱棺號慟俄
頃風止其母常患疽遐吮之遂瘳咸以為孝感所致
有子子靖莊最知名

柳靖北史柳遐傳靖字思休性方雅愛閒素澹於名
利博覽墳籍大同末除尚書度支郎隨遐入朝授大
都督歷河南廣德二郡守皆有治術吏民畏而懷之
秩滿還有終焉之志隋文帝踐極特詔徵靖以疾固

辭優游不仕所對琴書而已子弟奉之若嚴君有過必自責長幼相率謝然後見之鄉里亦慕而化焉時論方之王烈

柳莊北史柳遐傳莊字思敬善詞令濟陽蔡大寶有重名於江右時為岳陽王蕭譽咨議見莊歎曰襄陽水鏡復在於茲矣以女妻之譽辟為參軍歷吏部郎中

郭祖深南史列傳襄陽人武帝初為州牧州陷上書

言境上事不用徙後軍參軍武帝溺梵教朝政廢弛
乃輿櫬詣闕上封事帝嘉其正直擢鍾陵令改南州
散騎將軍及至南州清刻公嚴謝絕干請搜剔姦惡
朝野憚之

杜嶷南史杜崩傳其先杜陵人徙居襄陽父懷瑤少
有志節仕梁有戰功為刺史大同中魏軍復圍南鄭
懷瑤命嶷與戰斬其一騎以歸嶷膂力絕人便馬善
射每出殺傷數百人敵人憚之

杜崩南史列傳嶷之弟幼以膽勇稱為新興太守元帝以為武州刺史東征侯景敗崩入據臺城加江州刺史齊將攻秦州崩破之時長史陸納等叛長沙崩大敗之後討平武陵王於峽石卒謚武

杜幼安南史杜崩傳幼安性至孝寬厚雄勇過人與兄崩同歸元帝以為西荊州刺史封華容縣侯

杜叔毗北史列傳字子弼其先杜陵人徙居襄陽早孤事母盡孝仕梁為宜豐侯蕭循府幕叅軍周文帝

遣達奚武圍循於南鄭遣叔毗詣周請和使未反而
循叅軍曹策劉曉謀以城降時叔毗兄錫從子映映
弟晰並為循參軍有文武材畧策懼不同已誣以謀
叛加害焉及循降策至長安叔毗手刃策肢解之周
文嘉其志氣特命舍之遭喪哀毀骨立服闋遷陝州
刺史後為陳人所擒不屈死

康絢南史列傳字長明祖穆宋永初中舉鄉族三千
餘家入襄陽之峴南為置華山郡藍田縣以居之世

父元隆父元撫相繼為華山太守絢少倜儻有志氣
永元元年義兵起絢舉郡以應高祖隨王茂攻東昏
將吳子陽於加湖斬獲居多天監元年封南安男竟
陵太守屢退魏師十三年遷太子右衛率甲仗百人
直殿內絢身長八尺容貌絕倫雖居顯官猶習武藝
高祖幸德陽殿勅絢馬射撫弦貫的觀者悅之其日
上使畫工圖絢形遣中使持問之曰卿識此圖否其
見親如此後為司州刺史安陸太守年五十七卒謚

壯

岑之敬南史列傳字思禮棘陽人謙謹純篤穎敏好學五歲時讀孝經每焚香正坐年十六擢高第武帝召試令昇講坐勅中書舍人朱昇執經唱士孝章帝親論難應對如響除童子奉車郎引進後學恂恂如也從不以才學矜人子德潤有父風官至記室

魏益德壯史列傳襄陽人有材幹胆勇過人數從軍征討有功遷郡守蕭譽蒞襄陽承制拜大將軍及譽

稱制進位柱國封上黃縣侯加車騎將軍卒謚忠壯
配享祭廟

席固北史列傳字子堅襄陽人少有遠志梁大同中
為齊興郡守侯景亂以梁元帝不能復仇雪恥骨肉
相殘遂謀歸魏宇文泰遣使就拜大將軍開府大都
督入覲魏主譙賜甚厚進爵靖安郡公尋拜昌歸憲
三州諸軍事蒞官有聲績卒謚曰肅仍勅襄州賜其
墓田子世雅字彥文少以孝聞位至大將軍世英亦

授開府儀同大將軍

唐席豫唐書列傳字建侯襄陽人固七世孫舉制科
上第時年十六以父喪罷復舉手筆俊拔科會樂安
公主請為皇太女豫上疏請立皇太子語深切人為
寒懼太平公主聞其名表為諫官豫恥汙遁去俄舉
賢良方正累改為懷州司倉參軍復舉超拔羣類科
累遷中書舍人與韓休等名相甲乙韓休輔政舉代
已拜吏部侍郎豫典選六年拔寒士多至臺閣當時

推知人進禮部尚書封襄陽縣子凡四以使者按行
江南江東淮南河北南方俗死不葬暴骨中野豫教
以埋殮明列科條俗為之改豫清直無欲不為勢撼
性謹畏與子弟屬吏書不作草字曰細事不謹况大
事耶年六十九卒家無餘財屬其子賣所居聊備葬
禮贈江陵大都督謚文帝以豫詩最工詔曰詩人之
冠冕也弟晉亦以文名

柳渾唐書列傳字夷曠襄陽人早孤方十餘歲有平

告曰兒相天且賤為浮屠可緩死渾曰去聖教為異
術不若速死學愈篤天寶初第進士除衢州司馬棄
官隱武寧山召拜監察御史遷尚書右丞朱泚亂渾
匿終南山賊以宰相名榜其子索所在渾步至奉天
改右散騎常侍貞元元年遷兵部侍郎封宜城縣伯
三年以本官同中書門下平章事宰相張延賞怙權
遣親厚謂渾慎言於朝則位可久渾曰頭可斷舌不
可禁卒為所擠卒謚貞母兄識字方明知名士也工

文章與蕭穎士元德秀劉迅相上下而練理造端往往詣極渾亦善屬文沈思不逮於識云

鮑防唐書列傳字子慎襄州人幼孤貧篤志好學善辭章天寶末舉進士初為湘東觀察使薛兼訓從事累官工部尚書竇參秉政以宿忿遽令致仕防歷洪福京兆皆有政聲不因罪戾為俗吏所擯竟以憤終衆頗憫之

朱朴唐書列傳襄陽人以三史舉由荆門令改著作

郎乾寧初太府少卿李元實欲取中外九品以上官
兩月俸助軍興朴疏不可而止擢國子毛詩博士後
貶郴州司戶參軍卒

宋張問宋史列傳字昌言襄陽人舉進士通判大名
郡牧地歲久入於民有司按籍括之至毀廬發墓問
以聞仁宗曰吏用心悉如問何患赤子弗安立罷之
屢遷河北轉運使會河再決議者欲調京東民三十
萬自澶築隄抵乾寧問言非計神宗從之後貶光化

軍未幾復使河北諸葛公權之亂株連數百千人問
上疏申理止誅首惡熙寧末知滄州自新法興問獨
不阿時好歲饑為言免常平助賑語頗切直累官正
議大夫卒問廉潔嘗與种世衡善問父喪世衡遺汝
州田十頃辭弗受世衡卒其子古用父治命亦不納
田蕪者三十年朝廷命反諸种氏

張惟孝宋史列傳字仲友襄陽人通春秋下第乃工
騎射城中亂趨郢州開慶元年卜居江陵沙市宣撫

姚希得羅致之乃請空名帖三十以還逾旬與三十
騎俱擁甲士五千至部伍嚴肅希得大喜請所統姓
名惟孝曰朝廷負人福難禍易聊為君紓一時難耳
時鼎澧五州危甚於是擊鼓耀兵不數日衆至萬人
數戰俱捷江上平制使呂文招之不就而遁物色之
卒不可得

元黃元吉姓譜襄陽人有德行文學教授鄉里

明任亨泰分省人物考泰襄陽縣人幼穎敏出羣年

十三即賦朝天詩識者竒之洪武戊申廷試太祖親擢第一授修撰歷陞禮部尚書定旌表孝行事例並議定世子襲爵之禮甲午命與監察御史嚴正直使安南諭以討龍州趙宗壽之故日焜聞命震恐即奉詔使竣還朝以私市交人降為監察御史所著有使交集子顯宗永樂癸未鄉薦歷官吏部稽勲主事孫春西安府同知

蘭以權明一統志襄陽縣人洪武初以才能選授中

書省照磨值廣西寇作特遣撫之權宣布威德彘獐
向順卒賴底平擢禮部員外郎晉應天尹

張績明一統志襄陽縣人洪武庚午鄉薦拜監察御
史有直聲尋陞廣西按察司副使公廉有體百粵肅
然

李文郁字充實明一統志襄陽縣人洪武中以明經
薦為行人永樂初歷戶部右侍郎偕夏原吉治水有
勞以太廟失陪祀謫遼東二十年洪熙元年復通政

參議宣德中致仕卒郁性介直持守堅正久處患難
自信不惑

楊銘明一統志襄陽縣人永樂乙未進士才識過人
授戶部主事以勤能著稱尋陞太平知府政聲大振
呂昇字明遠襄陽縣人祖義永樂間以武功任綏州
衛千戶父貴翊扈英宗復辟拜錦衣衛指揮僉事昇
幼學於侍郎邢簡天順甲申登進士以戶部郎中督
餉邊州擢雲南參議值蒲蠻叛奉檄宣諭蠻皆帖服

病歸與李東陽商訂詩法卒東陽銘其墓

舊通志

王瑤字良玉襄陽縣人天順丁丑進士性耿介與人寡合歷戶部郎中督運淮揚漕運賴之都御史韓雍征大藤峽瑤餽餉有功擢彰德知府卒

王綸字廷言襄陽縣人天順庚辰進士授南刑部郎中出補山東僉事時齊魯大饑晝晦人相食綸至全活甚衆旋辭歸杜門讀書不妄交接曾孫兆熊東安

訓導

尚冕字從周棗陽人天順甲申進士歷刑部郎熟諳刑名每有大獄裁決如流為衆所嫉遂歸

張寬字伯仁襄陽縣人成化丙戌進士選庶吉士授翰林檢討遷雲南僉事興學敦化洱海孚悅

彭銓字大用襄陽縣人成化壬辰進士授大理評事轉寺正時山東歲荒往賑之多所全活子縉登弘治癸丑進士歷官雲南參政

袁仕字良輔棗陽人由進士歷官御史獨持風裁以

言事左遷

劉海字會川棗陽人由歲貢授黃巖縣丞時流寇趙燧等攻城官民懼欲棄城走海拔刀斷案誓以必守衆皆驚服城賴以全

韓春字景輝弘治辛酉舉人敏學篤行任南充令有循吏風

李應奎字文徵襄陽縣人由舉人知歸德州為政平易民立祠祀之鄉居推俸餘以周宗戚稱長者云

王凝字道甫宜城人嘉靖丙辰進士授禮部主事充
裕府講讀時穆宗在青宮獨正色直諫巡撫雲南綏
懷遠近滇人方之王恕云以上舊通志

劉存義分省人物考義字質卿襄陽縣人嘉靖癸丑
進士初任平湖修城拒倭後又同胡宗愈以計款首
惡徐海出其不意盡焚諸倭數百人於沈庄地方安
堵選入西臺屢有建白官至大理寺丞著西臺奏議
抱甕園集孫青藜舉人

魯點字子與南漳人萬曆癸未進士筮仕廣州以折獄中忌拂衣奉母歸補休寧令民尸祝之御史金聲

為之記舊通志

楊正芳字淳白均州人萬曆乙未進士為文務道人所未有司理平陽吏畏民懷進兵部侍郎

賈論字杼素均州人萬曆己酉舉人積學篤行鄉里稱美後令青陽簡易近民百姓便之

劉安行字淡星襄陽縣人萬曆己未進士歷知蕭山

登封嵩縣河南巡撫卬兆麟檄建璫祠與知州王家
賓力拒之行取吏科三王並封欲取道陸路家賓不
可安行曰嵩縣路果險不可行其勇敢執持如是後
歷陞巡撫

汪始亨號月掌襄陽縣人幼善屬文酉戌聯捷初授
博士以不附魏璫罷歸璫敗起兵垣為封疆選將力杜
苞苴債帥股粟劾舉李晏沈胡二疏不愧正色立朝
云

汪京號匡山自臨川籍襄以舉人同知馬湖府創修
城堞庭可羅雀子紹元孫應朝俱舉人

劉夢桂字九畹穀城人懷宗戊辰進士巡撫大同殊
勲異績表著一時卒於官

魯憲學字爾章南漳人領鄉薦博學善屬文精通書
畫詩詞避亂過害

張鸞均州人嘗讓產於兄姪以貢為葉縣丞有惠政
植柳於治北至今不伐號張公柳

蔡思續字孝克襄陽縣人以選貢令涪潭為民復侵
田丁母憂服闋補涉縣減石田逋賦

賈廷柱字柱明襄陽縣人貢士令東安以邑多璫寺

田宅即挂冠歸

以上舊通志

皇清王謹微字堯錫襄陽縣人康熙癸未進士為銅仁
令邑處邊徼民有冤抑者無所控告謹微至廉得
實概為申雪貴撫劉嫌其翻已案遣人密訪畧無
私意但聞百姓感頌聲因更器重之以年老乞休

劉愛其才憐其貧贈之匾額歸里杜門不出監司
郡守每遣肩輿迎至署中絕無一言及私年七十
六卒

鄖陽府

晉王遜晉書列傳魏興人廣漢守永嘉中代李毅為
南夷校尉寧州刺史郡久無太守功曹周悅行郡事
意輕遜遜怒殺之悅弟曷欲殺遜立趙濤遜誅之立
殺濤夷晉莫不惶懼時荒亂後倉無斗粟衆無一旅

遜惡衣菜食招集民夷勞來不倦五年克復會五茶
夷發夜郎莊躡墓遂討滅之及討惡獠剛夷數千落
威震南方官至平西安南將軍加益州刺史兼散騎
常侍封褒中伯

南北朝扶猛周書列傳字宗畧東梁黃土人世為渠
帥仕梁上庸新城二郡太守南洛北司二州刺史入
魏太祖以其世據本鄉厚加撫納割二郡為羅州以
猛為刺史徙賀若敦南討信州梯山捫葛備歷艱阻

雪深七尺糧運不繼猛獎勵士卒兼夜而行遇向鎮
侯列陣以待與戰破之乘勢直入白帝城撫慰民夷
莫不悅附譙淹敗走欲歸於梁猛與敦邀擊破之又
破蠻帥文子榮於汶陽武成中陳將侯瑱等逼湘州
赴救除武州刺史還復羅州刺史每戰輒有功進位
大將軍以疾卒

明李善房縣人洪武初授國學助教歷工部郎中權
廬州茶稅出納公明引年致仕士林重之

舊通志

彭忠竹山人喜讀書能文舉永樂庚子鄉試初為邑令累遷知常州府靖難甫平徙都燕北征役甚煩忠外給軍實內施撫綏治行為南畿第一

陳瑛竹山人貢士永樂初應詔除刑科給事奏劾無所忌內外震懾不愧司直

李文鄖縣人由歲貢歷仕江州推官平反數大案全活無辜江州人肖像祀之

宋珍鄖縣人歲貢條陳八事上鄖撫一分豁額外耗

糧二區處里甲差徭三均勞逸四通錢法五重學校
六正喪禮七興水利八均鋪舍鄆撫察其有裨民生
皆次第行之

曾得祿鄆縣人性磊落不務細瑣由進士歷官兵部
職方主事出鎮山海關邊烽無警及卒衣衾僅能蔽
體著有鎮東草

寇鼎上津人永樂庚子舉人平居教授生徒所成就
皆為名俊家故儉每傾囊資給貧乏及歷仕途廉惠

如居鄉時後知臨江府尤多惠政

劉濬上津人天順甲申進士授句容縣令擢御史時
宰執爭嬖權璫汪直濬獨抗節不阿會疾抱憤卒

潘榮竹山人永樂初由貢入監歷刑部主事讞決無
私嘗謂人曰一點墨一人命可不慎乎人服其言

周冕竹谿人性嗜學暑不扇冬不爐弘治乙酉舉於
鄉教授夔州士秉楷模子清登進士人以為讀書勵
行之報

周士竒鄖陽人由選貢授褒城令時流寇蜂起竒堵禦有方調南鄭令陞綏德州牧值賊衆數萬攻城竒率城中壯士夜襲之陝督上其功遂以西安同知擢商洛道監總兵左良玉軍多繩其士卒之不法者軍中肅然

劉鍾鄖縣舉人授英山諭教士以忠孝大節相激勸不責束脩餽遺庠中極貧者出俸資之士人勒石紀

德焉

以上舊通志

周清明一統志竹溪人正德辛未進士不樂仕進居
元和觀隱真洞中教授生徒嘉靖初以父冕命出授
浙江處州府推官復以賢能應徵卒於途中居鄉有
改運竹山之功鄉人感頌

秦嵩鄆縣人以進士授巴縣令政尚平易邑人德之
不忘

梁順甫鄆西人七歲父喪母羅氏守節教之甫殫力
勤學肄業南雍授義寧令有異政每旱禱立應邑有

虎作逐虎文焚之遂去在官思母有望雲集

以上舊通志

徐成楚三楚文獻錄字衡望竹谿人萬曆丙戌進士
初令內黃有訟鬻田不鬻井者陽不應使人浚井得
鐵鎮枯骨乃十年前田主所潛殺布商也遂按伏法
邑人神之歲旱蝗不入境以薦擢吏科給事中糾劾
不避權貴京師謠曰行行且止避癭瘠子以楚有癭
瘠子故也已而省親歸親歿起兵科行至襄陽而卒
陳鍊鄖西人以貢士歷任漢中推官有殺子以誣怨

家者鍊讞得情立雪之

舊通志

楊天申鄖縣舉人授江浦令陞延慶州牧裁冗吏均賦役招流亡勸耕種邊境大安民立祠祀

汪文亨鄖縣舉人授鄖都令陞商州牧寬徭輕稅政簡刑清商民愛戴事父母備極孝養居鄉謙和終身無一忿容

謝申之鄖縣人天啟丁卯舉人授政和令以循良著為諸生時貧甚人或餽遺却不受歲洊饑學使者令

置簿以賑或欲著其名申拂然曰疏食簞瓢自有孔
顏樂處何得以半錙辱我也以上舊通志

直隸歸州

唐田康恩施人貞觀中仕至黔州都督趙氏世為苗
長子渠帥姓李氏勝兵各萬人未嘗通朝貢康諷諭
之皆遣使入朝

趙國珍施州人唐開元中有趙君道代謝氏為牂牁
刺史封夜郎郡公珍天寶中有戰功閣羅鳳叛宰相

楊國忠兼劍南節度使以珍嫻方畧授黔中都督屢

敗南詔保障五溪十餘年仕至工部尚書

以上舊通志

宋胡勉明一統志長陽人建炎初寇鍾相等犯其邑
乃集豪勇斬二渠魁嘗攝縣事劉超將侵建平勉防
捍蜀道賊不得進凡破賊所獲金帛悉分其下毫釐
無取

元向午鳳楚紀恩施人至元二十一年征峒蠻充哨
馬把總身先士卒事平引蠻人入覲授開府將領

向紹榮楚紀恩施人元末召集鄉民守禦本州城池
大將劉應賢奏署元帥府事明玉珍據重慶屢召紹
榮不應玉珍將呂萬戶來攻紹榮敗之執萬戶時副
元帥譚登私釋萬戶以城降紹榮恥之遁入蠻中不
知所終

明裴承祖明一統志恩施人洪武中以秀才異等拜
監察御史命同御史張亨等八人署都察院事承祖
劾奏武定侯郭勛私畜家僮擅殺無憚帝命議其罪

已而宥之尋出為浙江僉事治獄平允不事苛刻擢
江西按察使

譚思敬明一統志巴東人洪武中以貢任大竹令徵
授兵科給事中言事直切出知岷縣尋陞山西平定
州守卒於官潔已愛民勸課農桑民皆殷富

張問禮字立齋恩施人萬厯丙子舉人初任睢州知
州清白自矢忤魏璫降馬湖通判尋遷嘉定着兩州
守告歸子應陽選貢陝西華州州同有惠政陞蘆州

府通判祀華州名宦

鄧弘烈字東昇施州衛官籍由鄉貢初任雙流知縣
督施兵征播連破三關及青山川崖諸屯楊應龍自
焚募士冒火取得其尸歷遵義府同知歸家貧如故

年九十卒

以上舊通志

皇清陳世凱恩施人平滇南不著兜鍪攻城身被數創
不退卒拔其城軍中號曰陳鐵頭歷官浙江提督
子三長季皆總兵中子天培仕至浙江提督

湖廣通志卷五十四

欽定四庫全書

湖廣通志卷五十五

人物志 行業

長沙府

東漢祝良長沙人後漢書南蠻傳永和二年日南徼外蠻夷區憐等數千人攻象林縣殺長吏大將軍從事中郎李固曰故并州刺史長沙祝良性多勇決可任用即拜祝良為九真太守良單車入賊中設方畧

招以威信降者數萬人嶺外復平

蜀漢蔣琬蜀志列傳琬字公琰湘鄉人以州書佐隨先主入蜀除廣都長先主嘗至廣都見琬衆事不理將加罪戮諸葛亮請曰蔣琬社稷之器非百里之才也其為政以安民為本不以修飾為先乃不加罪先主為漢中王琬入為尚書郎建興五年亮住漢中琬與長史張裔統留府事八年代裔為長史亮數外出琬常足食足兵以相供給亮每言公琰託志忠雅當

與吾共贊王業者也密表後主曰臣若不幸後事宜
以付琬亮卒以琬為尚書令時新喪元帥遠近危悚
琬神守舉止有如平日由是衆望漸服延熙元年詔
總帥諸軍屯住漢中又命琬開府明年就加為大司
馬東曹掾楊戲素性簡略琬與言論時不應答或構
戲於琬琬曰面從後言古人所戒戲欲贊吾是耶則
非其本心欲反吾言則顯吾之非是以默然又督農
楊敏曾毀琬曰作事憤憤誠不及前人或以白琬主

者請推治敏琬曰吾實不如前人無可推也琬以昔諸葛亮數闕秦川道險運艱不若乘水東下乃作舟船欲由漢沔襲魏上庸會舊疾連動時未得行九年卒謚曰恭

蔣斌 蔣顯蜀志蔣琬傳琬子斌嗣為綏武將軍漢城護軍鍾會至漢城與斌書曰桑梓之敬古今所敦西到欲奉瞻尊太君公侯墓當洒掃墳塋奉祠致敬願告其所在荅書曰亡考昔遭疾疢亡於涪縣卜云

其吉遂安厝之知君西邁乃欲屈駕修敬墳墓視予猶父顏子之仁也聞命感愴以增情思會得斌書報嘉歎意義及至涪如其書云斌詣會於涪待以交友之禮斌弟顯為太子僕會亦愛其才學

桓勝魏志桓階傳注階祖父超父勝皆歷典州郡勝為尚書著名南方

桓階魏志列傳階字伯緒長沙臨湘人太守孫堅舉孝廉除尚書郎堅擊劉表戰死階冒難詣表乞堅喪

表義而與之後太祖定荊州辟為丞相掾魏國初建
為虎賁中郎將侍中毛价徐奕以剛蹇少黨而西曹
掾丁儀屢言其短賴階左右以自全保文帝踐祚遷
尚書令封高鄉侯疾病帝自臨省徙封安樂鄉侯薨
謚曰貞侯子嘉嗣以階弟纂為散騎侍郎賜爵關內
侯嘉尚升遷亭公主與吳戰敗沒謚曰壯侯

桓嘉 見上

晉桓陵魏志注世語曰階孫陵字元徽有名於晉武

帝世至滎陽太守卒

鄧騫晉書列傳騫長沙人少有志氣為鄉鄰所重譙
王承命為主簿使說甘卓卓留為參軍以母老辭承
為魏人所敗又求騫甚急騫往詣之又喜曰君所謂
古之解揚也以為別駕歷武陵始興太守遷大司農
韓階晉書列傳階長沙人性廉謹篤慎譙王承辟為
議曹祭酒轉西曹書佐承為魏人所執送武昌階與
武延等同心隨從桓雄被害二人執志愈固及承遇

禍階延親營殯殮送桓還都朝夕哭奠葬畢乃還

鄧粲晉書列傳粲長沙人以高潔著名與南陽劉驎
之南郡劉尚公同志友善不應州郡辟命荊州刺史
桓沖卑詞厚禮請為別駕粲乃起驂之尚公謂卿忽
然改節誠失所望粲笑曰夫隱之為道朝亦可隱市
亦可隱隱初在我不在於物尚公等無以難之粲以
父騫有忠信言而世無知者乃著元明經十篇注老
子並行於世

南北朝歐陽頎陳書列傳頎字靖世長沙臨湘人祖
景達梁代為本州治中父僧寶屯騎校尉頎少質直
居父喪毀瘠甚至家產悉讓諸兄頻辟不應乃廬於
麓山寺旁專精習業博通經史起家信武府中兵參
軍事除天門太守時湘衡五十餘洞不賓敕令衡州
刺史韋粲討之粲委頎為都督悉皆平殄梁武稱頎
誠幹加超武將軍元帝承制以頎為東衡州刺史帝
遍問朝宰天下始定亟須良才卿各舉所知羣臣未

對帝曰吾得一人歐陽頤公正有匡濟之才恐蕭廣
州不肯致之時蕭勃在廣州與結盟荊州陷頤委質
於勃勃死後嶺南擾亂高祖使授頤都督衡州諸軍
事未至子紇已克定始興頤至皆懾服世祖嗣位封
陽山郡公薨贈侍中車騎大將軍司空廣州刺史謚
曰穆

歐陽紇

見上

唐歐陽詢唐書列傳詢字信本潭州臨湘人敏悟絕

人博貫經史仕隋為太常博士高祖微時數與之遊
既即位累擢給事中詢初倣王羲之書後險勁過之
因自名其體尺牘所傳人以為法高麗嘗遣使求之
嘗行見索靖所書碑觀之去數步復返至宿其旁三
日乃去貞觀初歷太子率更令弘文館學士封渤海
男

歐陽通唐書歐陽詢傳子通儀鳳中累遷中書舍人
居母喪年饑不克塋居廬四年不釋服冬月家人以

璠絮潛匿席下覺即撤去累遷殿中監封渤海子天授初輔政會張嘉福請以武承嗣為太子通與岑長倩等固執忤諸武意及長倩坐大逆死來俊臣引通同謀誅之神龍初追復官爵通書亞於詢父子齊名號大小歐陽體

五代劉昌嗣姓譜湘鄉人漢時為磁相二州刺史漢隱帝遇害昌嗣避地衡山馬氏招以賓禮不赴周行逢逼之昌嗣曰吾嘗致身漢氏縱不能為夷齊獨不

可效梅福乎改姓范號愚叟躬耕給餼粥以終身焉
宋胥偃宋史胥偃傳字安道長沙人舉進士甲科入
翰林為學士權知開封府忻州地震偃以為陽不勝
陰之效宜選將練師以防邊塞趙元昊朝貢不至偃
曰宜遣使問其不臣狀待其辭屈而後加兵則師出
有名宦人程智誠與二班使臣馮文顯八人抵罪帝
使赦智誠三人偃曰恤近遺遠非政也况同罪異罰
乎詔並釋之偃有良田數十頃既貴悉以予族人

胥元衡宋史胥偃傳子元衡有學行為尚書都官員

外郎

狄棐宋史列傳棐字輔之長沙人舉進士累遷太常少卿知廣州代還不以海物自隨知河中府有中貴人過郡言將援棐於上棐荅以他語退謂所親曰吾可以老而自汙耶為政愷悌不為表暴死之日家無餘貲

蕭注明一統志瀏陽人豪邁不羈善屬文詩尤清絕

登慶歷四年鄉薦授番禺尉值儂智高反注募兵力
戰連挫賊鋒進官西上閣門使

李受宋史李東之傳字益之長沙之瀏陽人也仕於
治平中至右諫議大夫天章閣待制兼侍讀屢以老
乞骸骨不聽神宗立進給事中龍圖閣直學士復言
臣在先帝時年已七十不敢竊祿以自安今又加數
年筋力憊矣惟陛下哀之於是拜刑部侍郎致仕賜
宴賦詩卒年八十贈工部尚書

鄧忠臣楚紀湘陰人熙寧三年進士第初任大理丞擢正字遷考功郎中時議范宣公謚忠臣覆奏詳允會黨論起以罪入元祐黨籍卒贈直秘閣弟孝臣杜門力學宣和間屢辟不就

彭天益姓譜攸縣人登元祐三年鄉薦崇寧初為太學博士以議論不合出為湖南提舉大觀初上封事力言權奸誤國年五十即致仕居司空山翛然有物外意所著有瑞麟集

鄧淵楚紀湘陰人登崇寧三年第初任郾延經畧使
入奏邊機徽宗嘉其敏練除國子丞遷虞部員外郎
大觀初值星變求言淵上封事言多剴切蔡京惡之
左遷監酒稅知懷州

譚世勣宋史列傳世勣字彥成長沙人第進士教授
郴州時王氏學盛行勣雅不喜曰說多而屢變無不
易之論也又中詞學兼茂科除秘書省正字為司門
員外郎遷吏部擢中書舍人以謹命令惜名器廣言

路畧賜予正上供省浮費六事言於上又請辨正宣
仁國史之謗述欽聖遺旨以復瑤華大享神祖仍用
富弼侑食釋奠先聖不當以王安石配後皆施行張
邦昌僭國稱疾卧不起以憂卒建炎初贈端明殿學
士

譚世選楚紀茶陵人以上書獻策補官凡五薦漕臺
三為舉首著毛詩傳二十卷史評八卷

譚申楚紀長沙人政和間進士張邦昌以為屯田郎

中力拒之紹興四年知筠州事禱旱於郊頃之大雨
歲饑民不能輸申請罷徵監司督益急坐降秩後致
仕歸民感其仁立祠祀之號曰古譚

王以寧姓譜湘潭人父長孺守靖州因言事落職以
寧由太學佐鼎澧帥幕靖康初羽檄召天下兵以寧
走鼎州乞師躬率入援解太原圍建元中以宣撫司
參謀制置襄鄧招諭羣盜桑仲等以老乞歸養母

鄧深姓譜湘陰人紹興中進士為太府丞出提舉廣

東市舶汪徹薦其才擢漳州路轉運使鹽酒虛額久
為民害深請蠲除之守令貪汙即劾奏之虞允文貽
書云不畏強禦思濟斯民挺然之操未見近比後以
朝散大夫終於家

王容楚紀湘鄉人宋孝宗淳熙間進士第一累官至
禮部侍郎卒贈銀青光祿大夫登第時有詩云名實
兩言雖朴語始終一節悉真誠

龔興姓譜湘陰人乾道進士剛介廉潔為浙東檢法

饋遺皆不受後知萍鄉民逋官賦輿以已俸代輸家
無儋石之儲

李揆姓譜瀏陽人乾道二年領鄉薦授寧遠尉獲盜
十數或曰可用賞脫選揆曰殺人以階榮顯吾不為
也累官中書舍人

湯壽宋史列傳壽字君保瀏陽人淳熙十四年進士
德安府教授遷國子博士時召朱熹為侍講未幾辭
歸朝廷從其請壽上疏宜召還不報歷禮部駕部郎

官出知常州入為大理少卿進直徽猷閣卒琦負直
槩與韓侂胄陳自強不合禮曹例掌三省奏記臨安
大火寧宗避正殿中書三表請復琦屬詞持大體不
為阿曲言者撫其語涉訕上而朝廷實知其無他起
復制辭有清風峻節之語

易被楚紀字彥輝寧鄉人淳熙中進士第一累官禮
部尚書封寧鄉開國男退閑三十年號山齋居士所
著有周禮周易總義釋禹貢疆理記漢南北軍制諸

書

吳獵宋史列傳獵字德夫醴陵人登進士第召試守
正字光宗以疾久不覲重華宮上疏曰今慈福有八
十之大母重華有垂白之二親陛下宜問安上壽恪
恭子職又白宰相乞召朱熹楊萬里寧宗即位趣修
大內將移御獵言壽皇破薄俗行三年服陛下萬一
輕去喪次將無以慰在天之靈又言宜篤厲精誠以
俟上皇和豫而祇見焉會偽學禁興獵言朱熹昇祠

中外惶駭謂事不出於中書是謂亂政駁史浩謚請以張浚配享阜陵議皆不合江陵告饑請出大農萬緡以賑饑者吳曦反於蜀請王大才彭輅任西事曦誅以敷文閣學士四川安撫制置使兼知成都府嘉定六年召還卒蜀人畫像祠之獵初從張栻學乾道初朱熹會栻於潭獵又親炙湖南之學一出於正有畏齋文集奏議六十卷謚文定

皮龍榮宋史列傳龍榮字起霖醴陵人淳祐進士歷

官資善堂直講請以改過之實易運化之名陞著作
郎入對因及真德秀崔與之庶願崇獎之以風天下
帝以為然又言忠王之學願陛下身致之於內帝嘉
納之遷吏部侍郎魚贊讀封醴陵縣男景定二年拜
參知政事封壽沙郡公罷奉祠咸淳元年賈似道諷
湖南提點刑獄李雷應劾之徙衡州未至而沒龍榮
少有志畧性伉直卒為似道所擯

楊大異宋史列傳大異唐天平節度使漢公之後十

世祖祥避醴陵因家焉登嘉定進士授衡陽主簿有
惠政調龍泉尉移安遠尙寇擾民大異肩輿諭降除
四川制置司參議官北兵入成都大異巷戰闔門皆
遇難詰旦復甦遷大理寺丞平反冤獄者七召對極
言時政得失忤宰相意出知澧州理宗曰是死節更
生楊大異耶命予節提點廣東刑獄兼庾事時常平
逋負山積大異與之約縱遣之如期畢輸提點廣西
刑獄兼庾漕二司姦吏屏息寇盜絕跡廣海數千里

道不拾遺報政為最未六十即丐致仕章四上除大
中大夫提舉崇禧觀醴陵開國男歸里第與居民無
異學者從之相與發明經旨條析理學卒年八十二
子霖霆

鄭應龍姓譜字少慈長沙人慶元中登第後試律中
首選調潭州理掾麗狴犴者以理開諭皆得其情有
兵士盜帥金下獄株連數人皆坐流應龍力爭帥意
未解應龍曰若使罪及無辜有去官而已帥歎曰其

人若不勝衣乃能執法如此

胡穎宋史列傳穎字叔獻湘潭人中童子科尤長於春秋紹定三年趙范討李全檄穎入幕穎微服行諸營察衆志嚮歸必三鼓五年登進士授京秩歷官浙西湖南提點刑獄移湖南毀淫祠數千區衡州有靈祠吏民夙所畏事穎撤之作來諭堂奉母居之為廣東經畧安撫使潮州僧寺有大蛇前後仕於潮者皆信奉之穎殺之毀其寺咸淳間卒贈四官穎為人正

直剛果不畏強禦在浙東榮王府十二人行刼穎悉
斬之一日輪對理宗曰聞卿好殺意在浙獄對曰臣
不敢屈太祖之法以負陛下

歐海姓譜茶陵人楊誠齋名重於時海持所作徃見
令熟讀語孟丁酉復徃見誠齋喜曰子非吳下蒙矣
是歲果登第

元歐陽玄元史列傳字元功瀏陽人其先世家於廬
陵曾大父新遷瀏陽玄幼岐嶷母李氏親授孝經論

語小學諸書八歲知屬文延祐元年以尚書與貢明年賜進士出身授岳州路平江州同知調蕪湖縣尹縣多疑獄玄皆為平翻豪右不法虐驅其奴玄斷之從良貢賦徵發及時民樂趨事教化大行飛蝗獨不入境致和元年遷翰林待制兼國史院編修官條時政數十事實封以聞多推行之至正五年拜翰林學士承旨乞致仕特授湖廣行中書省右丞將行仍前學士承旨進階光祿大夫卒贈崇仁昭德推忠守正

功臣大司徒柱國追封楚國公謚曰文玄性度雍容
含弘縝密處已儉約居官廉平三任成均兩為祭酒
六入翰林三拜承旨修實錄大典三史屢主文衡兩
知貢舉凡宗廟朝廷雄文大冊播告萬方制誥多出
其手文章道德卓然名世有圭齋文集傳於世

互詳
寶慶

府名
宦

李祁茶陵人元統廷試揭奚斯等讀祁所對策擬冠
是科啟緘則南士也遂改次李齊齋病仍以祁為狀

頭授應奉翰林文字以母老就養江南改同知婺源
選浙江儒學副提舉以母憂還鄉廣西憲臣薦起為
湖南僉事道梗未赴明興力辭徵辟隱永新山中
志

明張啟楚紀善化人洪武丙子鄉薦入胄監選授吏
部主事轉郎中操履清慎歷官浙江布政使

彭友信姓譜攸縣人洪武初貢至京太祖微行遇之
上口占虹霓詩云誰把青紅線兩條和雲和雨繫天

腰命續之友信應聲曰玉皇昨夜鑿輿出萬里長虹
駕彩橋上大悅問其籍命翌晨候於竹橋同入朝友
信如言候伺遂失朝上召至殿前問故以實對上曰
此秀才有學有行命為壯平布政使

劉三吾明列朝詩傳茶陵人父耕孫元末翰林學士
三吾提舉靖江學洪武十八年用薦除左贊善二十
一年撰御製洪範注後序稱旨升學士三年考滿年
七十九矣三吾老於文學典司文章朝廷大制作多

出其手

陳謙茶陵人洪武時進士任瀘州知州瀘隸潼川復屬重慶謙三疏改隸藩司民甚便之瀘地苦旱謙行社倉法民不告饑九年秩滿民請留任三年束身廉謹卒於官惟布被一襲米數升而已

舊通志

陳寧楚紀茶陵人元末從軍至金陵代諸將言事太祖異之歷中書省參議出知廣德州歲大旱奏免租不報寧赴闕上言民饑催稅太急是為張士誠毆民

也上曰爾乃膽大敢為此言耶竟從之累遷兵部尚書浙江行省參政復召為御史中丞寧嘗率御史商嵩入奏上正冠方召見以嚴見憚人比汲長孺云

陳南賓茶陵人洪武三年聘至都除無隸丞歷膠州同知以經術飾吏事召為國子助教嘗入見講洪範九疇帝書姓名殿柱擢蜀府長史蜀獻王好學敬禮尤至為構第名安老堂詩文清勁有法卒年八十

明史

稿

周謨楚紀瀏陽人洪武中以明經舉授河南左參政
文學該洽優於吏治

劉聲遠明一統志字茂實湘鄉人洪武中鄉薦授梁
山令有政績擢戶部郎中歷官山東參政所至有能
聲

譚子發楚紀茶陵人洪武癸酉鄉薦英敏善屬文初
授國子博士歷陞祭酒時祭酒王顯宋訥後先居成
均而子發繼之克自樹立文章模楷士林推服

周幹明一統志瀏陽人洪武中以貢入太學授山西
布政司照磨廉慎有為才名大著永樂中歷陞浙江
右布政使有惠政浙人懷之

張武瀏陽人豁達有勇力稍涉書史為燕山右護衛
百戶從燕王起兵論功封成陽侯食祿千五百戶卒

贈潞國公謚忠毅

明史稿

李守中楚紀寧鄉人洪武中貢入胄監授賀縣簿永
樂中入為工科給事中多所匡弼交趾平求廉能吏

為牧守擢知快州歷陞廣東左參議

何楚英姓譜攸縣人永樂己丑進士拜監察御史歷
官雲南左布政使累賜勅褒嘉至今滇人猶稱其善
政

賀宗楚紀湘鄉人宣德庚戌進士官大理評事嘗疏
言其邑稅增重而田多被水民苦役輸請減十之一
湘人賴之正統間浙寇葉宗叛宗畫策討之上命同
尚書石璞往蒞其事寇遂平

王偉攸縣人隨父謫戍宣府年十四獻安邊頌宣宗
命補保安州學生舉正統元年進士選庶吉士授戶
部主事英宗北狩命行監察御史事集民壯守廣平
于謙重其才引為職方郎中軍書填委處分皆中窾
會擢兵部右侍郎小田兒者木中國人叛出塞為邊
患謙屬偉圖之會田兒隨貢使入至和陽城壯士從
道旁突出斷其頭去使者不敢詰

明史稿

唐震醴陵人正統甲辰進士歷官戶部員外郎以勤

蘆著名除四川參議提督邊儲撤淫祠完城堡清操
如一日以參政致仕年八十一有東軒稿舊通志

賀勛楚紀湘鄉人景泰丙子鄉薦第一歷官雲南參
政以直著聞與俗寡合引疾還家屏居一室環堵蕭
然

李東陽字賓之茶陵人四歲能徑尺書景帝召試之
抱置膝上後兩召講尚書大義稱旨命入京學年十
六成進士選庶吉士授編修累遷禮部右侍郎進太

子少保禮部尚書兼文淵閣大學士劉瑾入司禮務
摧抑縉紳老成忠直放逐殆盡東陽遇傳免日講日
晏視朝每拜疏切諫劉健謝遷劉大夏楊一清輩幾
得危禍賴東陽而解其潛移默奪保全善類天下陰
受其庇以老疾乞休卒年七十贈太師謚文正東陽
為文典雅流麗朝廷大制作多出其手工篆隸書碑
版篇翰照耀四裔獎成後進推挽才彥學士大夫出
其門者率繁然有所成就立朝五十年清節不渝既

罷政家居購請詩文書翰者填塞戶限頗資以給朝
夕一日夫人方進紙墨東陽有倦色夫人笑曰今日
設客可使案無鮭菜耶乃欣然命筆移時而罷其風
操如此

明史稿

孫秦楚紀醴陵人弘治己酉鄉薦授銅梁令適山寇
攻邑秦先士民登陴固守城賴以完斷獄平允鄰縣
民爭訴於庭官居清苦在任十年惟以一僕自隨徵
拜監察御史

彭澤楚紀長沙人隸籍陝西蘭州衛舉弘治庚戌進士授工部主事轉刑部員外郎進郎中出補徽州知府徽土多訟悉懲之時進俊髦講解經義歷陞都御史兵部尚書經畧哈密撫綏寧夏功績甚偉加太子太保

譚玉瑞楚紀茶陵人弘治癸丑進士授行人進司正處約無戚容在官無私蓄奉使寧藩餽遺一無所受楊志學楚紀長沙人弘治癸丑進士歷官都御史巡

撫大同邊卒屢殘其主帥懼誅首鼠兩端志學諭以
至誠一軍皆定入為戶部侍郎陟尚書扈駕巡幸興
都督餉免租民蒙其澤卒謚康惠

龍誥明一統志攸縣人正德戊辰進士初知臨川縣
時東鄉盜起不煩兵而定擢戶部主事歷郎中出知
廬州府歲荒出賑奏罷馬價茶芽等稅全活者數十
萬人累陞廣西參政著東州奏議廬陽荒政錄

龍大有茶陵人正德丁丑進士歷州郡有惠政備兵

粵西開藩中州具有勞績巡撫大同戮力擒寇晉兵部右侍郎以剛直忤權貴謫戍全州赦歸

徐一鳴廷用子正德丁丑進士初授禮部主事遷吏部驗封司郎中有怙勢踰請者一鳴堅執不阿補江西督學以毀淫祠抑閹室左遷乞休擢南京刑部郎高卧不起有淶江集行世

以上舊通志

張治明列朝詩傳字文邦茶陵人正德庚辰會元選庶吉士授編修以贊善使交南以吏部左侍郎掌院

以南京吏部尚書入為文淵閣大學士加太子太保
世宗在西內召輔臣入直撰科書治忽忽不樂遂發
病卒謚文隱隆慶初改謚文毅有龍湖詩集行世

皮東山攸縣人正德癸酉鄉薦授永川令廉能著聲
直指行縣聞其名徑造入室其儉陋殆非人所堪者
薦拜御史按大同宣府威行徼外改四川恤刑至永
川先是士民生為立祠東山至則請留宿祠中是夕

竟端坐而逝

舊通志

尹尚賓姓譜茶陵人嘉靖丙戌進士授戶部主事進
郎中理鹽廠有商挾賂求私不聽商復賂他人事覺
尚賓矚然無所污冢宰許讚每亟稱之

魏煥明一統志長沙衛人嘉靖己丑進士授嘉興府
司理歷兵部員外郎擢四川僉事戢苗民之頑獷平
土司之獄訟著有九邊圖蜀東撫夷錄皇明拱衛錄
楊守謙志學子字允亨嘉靖己丑進士授屯田主事
改職方郎中出為陝西副使擢僉都御史巡撫山西

上言偏頭老營堡二所餘地千九百餘頃請興舉營田薦副使張鎬為提調牛種取給本土報可俄移撫延綏請久任鎬終其事二年營田大興計秋穫可當帑銀十萬邊關穀價減十五進副都御史巡撫保定兼督紫荆諸關去鎮之日傾城號泣有追送數百里外者守謙馭下多恩意守官庶位至開府蕭然若寒

士
明史稿

廖希顏茶陵人嘉靖壬辰進士授高安令設常平倉

築隄鑄鐵犀鎮之陞工部主事經理剔弊悉中機宜
扈駕幸承天尋進郎中疏請撤行宮示不復用有撫
拾其罪者上曰廖希顏才識精敏合加俸擢山西提
學講業河汾書院有河汾夫子之目會海賊熾御史
檄勦捕殲厥渠魁晉浙江廉使

蕭禹臣長沙人嘉靖丁未進士初令遂寧作息訟辨
民俗還醇陞營繕員外郎預修三殿殫心經理世宗
屢撤膳以賜

王學顏湘潭人嘉靖癸丑進士選翰林院庶吉士進
編修入國史館以強項忤時相出為廣東督學殫力
校課人文丕振

唐九德湘潭人嘉靖丙辰進士任新喻令廉斷有威
擢戶部郎督臨清廠稅除漳州副使值閩賊猖獗九
德勒兵勦戢威惠大行備兵金衢參藩粵東運籌督
戰多收奇績

劉應峯茶陵人嘉靖丙辰進士授南昌令有治劇才

以卓異擢吏部主事歷江西參議疏乞終養留心
學建旌忠書院學者景從著有衡雲山集

龍光長沙衛人嘉靖壬戌進士任蘓州府節推以治
行高等晉吏科給事中歷掌科事有所建白悉見舉
行轉山東布政使

蔡承植攸縣人萬曆庚辰進士累官南太僕少卿性
恬澹持身省約晏客外舉家蔬食而已守嘉興俗尚
侈靡聞太守高潔不肅而戢時南方郡守有四君子

之稱承植其一也

以上舊通志

黃洽中三楚文獻錄善化人萬厯癸未進士宰歸安
樂平並稱廉敏擢守晉陽減地畝稅二萬餘兩改南
安請蠲木價五萬有存留庫鍰二千兩洽中命以抵
餉修學宮建賢祠崇務以教化為治嶺表士民翕然
向服

胡應台字徵吉瀏陽人萬厯戊戌進士授中書舍人
擢兵科給事中轉吏科以直忤時相出為江西按察

副使旋除督學稱得人歷陞太僕卿巡撫應天振肅
風紀晉兩廣總督威名益著名為南司寇忤璫奪職
懷宗朝起南兵部尚書轉北時上綜核尚嚴應台持
法平允多全國體以親老歸養

羅其綸茶陵人萬曆乙卯鄉薦初為太康教諭徵修
熹宗實錄陞瓊州府推官時黎人叛亂蔓延二十年
其綸單騎宣諭解散其衆遂入其地為水會所璽書
嘉勞嘗被檄理嶺東北獄釋冤繫八十三人擢戶部

主事晉郎中以母老歸養有遺編曰海上吟北歸錄

以上舊通志

石萬程三楚文獻錄湘潭人天啟壬戌進士仕戶部
郎權濶闊寒儉自持闕政肅清出為徽州守值黃山
議起不忍貽害無辜與當事力爭弗克遂掛冠歸臺
省交薦補知常州府念毘陵才數務簡樹名雋甚得
士心辛未入覲考功課天下卓異第一以足疾歸復
起知杭州值廷鞫海寧吳中彥父子事執法甚堅中

彥窘急入賄萬程峻却吳竟抵法陞溫處兵備副使
核餉飭軍具有次第海寇犯三關萬程至皆請撫海
氛以平

郭都賢益陽人天啟壬戌進士授行人陞江西提學
號稱得士累遷都御史巡撫江西黜貪墨獎循良水
霜凜凜人不敢干以私凡闕國計民生章疏反覆必
待奏可乃已晉兵部侍郎歸

李可埴善化人天啟壬戌進士授溧水令調封邱分

校鄉闈取士半捷南宮擢南京戶部主事除鳳陽知府為政方嚴不阿人多敬憚之

以上府志

周堪廣寧鄉人天啟乙丑進士授永春令調福清治行為閩吏冠擢御史巡按正順等處持法平允決疑獄多所全活晉掌河南道筦庚辰大計以端謹稱擢順天府時河決屢告特加工部侍郎命往視河省費數萬隄工用成

廖國遴長沙人以進士任揚州司理時內臣楊顯名

奉使怙勢逞威國遴庶得其不法事列上按臣楊稍
斂手已卯分校南闈得人最盛調保定修城賑饑克
著勞績擢戶科給事中疏劾權輔薦起名臣劉宗周

鄭三俊舉朝憚之

以上舊通志

皇清劉友光攸縣舉人補沙河令居官廉能釐剔陋規
陞行人司未上卒

陽始亨攸縣人副榜貢生大學士李蔚疏薦隨征
陝西大將軍圖海復薦補宜川令招撫流移編審

丁餉有仁明之稱卒於官

黃學和善化人好學力行由明經授瀏陽教諭課
士以行誼為先二子昉鈇昉順治甲午舉人知四
川華陽縣撫綏凋瘵躬耕自給以縣裁并還里鈇
壬辰進士累官吏部驗封郎中典試河南號稱得
人

尹惟日茶陵州人順治壬辰進士知廣東和平縣
才識敏練時九連山寇猖獗賊踞岑岡四省會勦

不克惟日單騎深入招撫賊感泣來歸復條陳固
守機宜請設官駐守岑岡修葺營房兵民安堵卒
於官士民置祭田陪祀王守仁祠

王岱湘潭舉人授隨州學正陞京學教授造就人
材多所甄拔陞澄海令人誦清明工書畫詩有唐
鄭廣文之目

黃中理湘潭人善化學生中康熙癸酉經魁甲戌
成進士授庶常以親老告終養杜門視膳足跡不

履城市昆弟四人釀酒籩豆極既翁之誼子姪皆
讀書能文父母沒中理年已八十餘哀毀盡禮

裴正時善化人康熙庚辰進士任信宜令私派盡
革催科不擾均鹽漆之利置膳士之田士民樹碣
頌之值粵中告饑總憲趙申喬奉

旨賑救以在湖南舊識特委任焉正時請先覆校斗斛
然後開設粥廠饑民多所全活

陳鵬年字北溟湘潭人少負才名康熙辛未進士

初令浙之西安時兵燹後流逋轉徙豪右并兼民
田鵬年履畝丈勘並請豁除宿負自是流民復業
烈婦徐氏十載沉寃鵬年按誅首惡營墓立祠為
文刻碣以表顯之改山陽首革耗羨重懲闕蠹勸
士民以務本力農尤諄諄於重庶恥戒奢靡止爭
鬪惻然與淮人更始風俗為之一變陞知海州奉
旨賑饑山左立法振廩無勺龠不逮民者擢守江寧抵
上江兩令解中出不意悉得其重耗奸弊乃令民

輸錢者自封投櫃中斷親喪奔赴之陋俗立士女
冶游之厲禁尋以爭事遭吏議旋奉來京修書之
旨復出守蘓州值饑疫相仍請上游發米平糶躬製方
藥駕小舟徧歷村墅計口授之且量給錢米所全
活無算捐貲濬城河民稱利便鵬年所涖兩郡地
大事繁案牘填委勤敏決遣竟無滯獄至旁郡徙
獄委勘無不得其情實雪枉鉏兇到蘓之日大書
署其門曰求通民情願聞已過鵬年清操律已而

寬恕愛人故所至有聲兼攝藩篆善政尤多再被
劾得釋

命武英殿修書總裁出署霸昌道篆旋奉

旨同張鵬翮辦理河工河決武陟馬營口漫溢至張秋
鵬年躬親相度具得地形高下區畫條理奏請於
決口對岸上流開引河使溜南趨稍東開引河引
溜東行仍歸正河使水勢旁洩方可次第堵築並
請發帑估修長椿大埽以資捍禦奏入奉

俞旨未幾

命署理總督河道邱務薦諳練之賢員以收實用察虛
鬆之隄工以責後效屬僚遂水競董事馬營再決
復請於王家溝挖引河一道使一律深通適西北
風大起大溜直貫引河河流漸徙而南老黃河內
水隨沁水入決口者僅十分之一二遂盡力堵塞
復奉

旨回辦南工時漕渠淺澀鵬年遣幹吏直溯淮源疏其

上流清水得以暢達三至武陟又請開官庄峪引
河南壩尾既合北壩尾合而復開者四鵬年奮欲
捐軀官弁民夫悉力加幫亦告成功

皇上嗣登大寶矚念忠勤

特旨授總督河道兵部侍郎兼副都御史鵬年感泣拜
命風餐露處積勞病腫比疾篤

恩賚稠疊存慰備至鵬年口占謝疏竟卒於武陟

愍綸優異

賜賻金二千兩謚恪勤封其母一品太夫人廕子一品
官生鵬年貌魁碩鬚髯若神性介特然喜甄拔後
進上下古今胷次卓犖亦跌宕自抒寫有詩文集
共六十二卷歷任政畧河工條約各一卷子樹芝
令揭陽以卓異薦樹萱官工部侍郎

朱竒珍長沙人康熙丙子舉人令福建同安清白
自矢革陋規除刁橫催科分戶派額民免賠累繕
治圉圖男女犯科者獄各有別宿繫可開釋者立

為申谿捐俸修朱子祠建高士軒士民德之以告
養去官

衡州府

東漢蔡倫後漢書列傳桂陽人以永平末始給事宮
掖和帝即位轉中常侍與參帷幄倫有才學盡心敦
慎數犯顏匡弼得失自古書契多編以竹簡其用縑
帛者謂之為紙縑貴而簡重並不便於人倫乃造意
用樹膚麻頭及敝布魚網以為紙元興元年奏上之

帝善其能自是莫不從用焉故天下咸稱蔡侯紙元
初元年封為龍亭侯

谷朗姓譜耒陽人事繼母以孝聞歷官九真太守

胡騰後漢書竇武傳武府掾桂陽胡騰字子升桓帝
巡狩南陽以騰為護駕從事公卿貴戚車乘萬計徵
求費役不可勝極騰上言天子無外乘輿所幸即為
京師臣請以荊州刺史比司隸校尉臣自同都官從
事從之自是肅然莫敢妄有干欲騰以此顯名官至

尚書

晉羅含晉書列傳含字君章耒陽人少有志尚嘗晝
卧夢一鳥文彩異常飛入口中自此藻思日新含父
嘗宰新淦新淦人楊羨後為含州將引為主簿辭不
獲而就焉羨去職含送之到縣新淦人以舊宰之子
咸致賂遺含受之及歸悉封置而去後為郡功曹刺
史庾亮以為江夏從事太守謝尚稱曰羅君章可謂
湘中之琳琅累遷廷尉長沙相年老致仕初含在官

舍有一白雀棲集堂宇及還家階庭忽蘭菊叢生以
為德行之感焉

南北朝鄧正直楚紀衡陽人以行義聞陳永定初歐
陽顏刺衡州雅知其賢辟為盧陽令罷征弭盜修城
濬河興學崇教人多稱之

唐趙知微楚紀衡山人穆宗時上言時政詞氣激切
帝名宰相慰諭之宰相因賀天子能納諫然終不能
用

五代廖凝姓譜字熙績衡陽人仕南唐宰都昌縣以
廉自守秩滿題詩修江寺云五斗徒勞更折腰三年
兩鬢為民焦今朝解印吟歸去還挈來時舊酒瓢

宋曹裕姓譜耒陽人舉進士為潭州司錄參軍能辨
枉獄後宰溧水值歲蝗漕使以歲計不足諷諸邑裕
曰吾寧忍視其死而不救之卒以實聞

曹洪明一統志裕子舉進士為永興令邑小民貧上
供匱乏洪歎曰吾入厯縣未嘗橫斂豈以暮年倒行

逆施乎遂棄官歸

胡晏明一統志衡陽人資性孝友鄉里慕之有爭訟不到公庭多往質焉大開館舍延禮四方賢士以迪諸子及卒孔武仲表之曰處士胡君之墓

廖偁 廖倚楚紀偁衡山人天禧間進士好古能文章其德行聞於鄉里所著有朱陵編弟倚亦以能詩知名於湖南一時賢士皆與之遊

襲蓋卿明一統志字夢錫常寧人以明經擢第即往

師朱文公明義理之學入諫垣為右正言以直道事
君按朱子池州語錄益卿所撰

李譽姓譜桂陽人元豐進士為廣西靈川令地多崗
苗譽至以德化之三年民皆脫刀劍務農桑當道勞
之曰此古之龔黃也

趙世德姓譜衡山人宣和間進士初攝鄉邑時邑遭
兵燬移治上封賊曹成大掠脅世德斂民金帛世德
不從被執以死自誓百姓相率以金帛贖還後移官

廣西機宜

韓京字世京安仁人膂力過人長於謀畧紹興間仗

義勤王累立戰功官忠亮大夫

舊通志

黃珙姓譜衡陽人資質方正嘗以善行誨人長子師
道仕為屯田郎中次子師旦為屯田員外郎皆以清

白材幹聞

趙崇宋史趙方傳衡山人父崇少從胡宏學慷慨有
大志嘗見張浚於督府浚雅敬其才欲以右選官之

崇不為屈累以策言兵事浚竒之命子栻與崇交子
方遂從栻學

趙方衡山人宋史列傳方淳熙八年舉進士知青陽
縣告其守曰催科不擾是催科中撫字刑法無差是
刑法中教化人以為名言提舉京西常平時劉光祖
以耆德為帥方自言性太剛請光祖書勤謹和緩四
字以為戒權江陵府增修三海八匱以壯形勢進徽
猷閣學士京湖制置大使病革曰未死一日當立一

日紀綱貽書宰相論疆場大計尋卒方起自儒生帥邊十年以戰為守留意人才知名士皆拔為大吏諸名將多在其麾下藩屏一方使朝廷無北顧之憂累贈太師謚忠肅

趙葵宋史列傳字子葵方南仲與兄范俱有志事功方器之聘鄭清之金子才為師又遣從李燾為有用之學葵遇敵則深入死戰屢獲捷一日方賞將士恩不償勞軍為變葵時年十二覺之亟呼曰此朝廷賜

也本司別有賞賚軍心賴一言而定嘉定十五年進
淮西安撫參議官十七年李全往青州淮東制置使
許國檄蔡議兵蔡請視兩路之兵別其精銳君侯畱
三萬帳前賊不敢動矣國不聽卒敗紹定元年知滁
州二年全將入浙西告糴蔡策其必叛致書史彌遠
曰李全既破鹽城蔡日夜延頸以俟制帥之設施今
乃聞遣王節訴哀於逆又聞遣二吏請命於賊婦堂
堂制聞如此舉措豈不貽笑天下蔡非生事起釁李

全決非忠臣孝子丞相發兵討叛可以強國勢安社稷蔡父子世受國恩亦庶幾萬一之報加蔡淮東提點刑獄帥步騎萬四千命王鑑等將之全攻揚州東門蔡親出搏戰數戰皆捷遂殺全淳祐四年同知樞密院事奏乞與宰臣講求規畫凡有關於社稷安危治亂之大計條具以聞審其緩急以圖籌策又乞剏游擊軍三萬人以防江從之九年特授右丞相封信國公咸淳元年致仕特授少師進封冀國公薨是夜

五州星隕如箕贈太傅謚忠靖

趙范宋史列傳范字武仲少從父軍中嘉定十四年
出師唐鄧范與蔡監軍孟宗政時知襄陽使人問曰
金人在蘄黃而君攻唐鄧何也范曰不然撤襄陽之
備以救蘄黃則唐鄧必將躡我後且蘄黃之寇正銳
曷若先擣唐鄧以示有餘唐鄧應我之不暇則吾圍
不守而自固寇在蘄黃師日以老然後回師蹙之可
勝敵而無後患進知揚州請剏馬軍三千招遊手之

強壯者及籍牢城重役人充之別籍民為半年兵春
夏在田秋冬教閱官免建砦而私不廢農彭義斌請
合謀討李全范獻計廟堂紹定元年知鎮江府三年
丁母憂起直徽猷閣淮東安撫副使為書告廟堂請
罷調停之議朝旨許范刺射陽湖兵就聽節制遂戮
全進兵部侍郎又進端明殿學士東京留守兼江淮
制置使嘉熙四年卒於家

趙錫衡陽人知吉水縣簡靜慈祥民稱為趙佛子歸

道茶陵值寇被執有識者曰此佛子也送之出境

舊通

志

趙璠鄧光薦文丞相督府忠義傳衡山人登甲戌進士第丁丑五月朔與其叔父漂起兵湘鄉督府以璠書達行朝授軍器監號名勤王

元曾圭衡山人詳永州府名宦

陳楚舟臨武人由明經授官泰定間奉使南番却金珠之餽使還上廉其狀御書雪逢二字賜之

舊通志

明劉紹先楚紀衡山人洪武甲戌貢入胄監令休寧勤以蒞政賦役均平知宿州擢刑部員外郎歸耕衡山之下有驛使問其家紹先適操耜在田間親指示之已乃具衣冠出揖驛使驚謝

李思聰桂陽州人洪武甲戌進士授行人緬甸遣使來訴百蠻侵軼其境奉詔往諭罷兵思倫發聽命會其部酋刁幹孟叛亂思聰宣示朝廷威德遂懾服思倫發餽遺寶器賦詩却之使還圖其山川險要以進

太祖嘉之賜衣一襲擢江西右叅議食二品俸

舊通志

譚有得楚紀安仁人洪武中貢入胄監知莒州泣事
精敏遷知揚州府轉廬州擢四川按察使詳慎刑獄
廉介有聲

茹瑞楚紀衡山人洪武中由監生除承勅郎歷通政
使勤職為太祖所寵二十三年拜右副都御史陞兵
部尚書加太子少保建文帝即位改吏部尚書出掌
河南布政司事尋召為兵部尚書永樂初詔封忠誠

伯食祿千石終其身仍兵部尚書選其子鑑為秦府
儀賓

謝必賢耒陽人永樂間由鄉舉知雒容縣平徭寇再
除寶坻遷江都皆有政績歷知德慶無為二州既去
士民咸思之

羅以禮桂陽州人永樂乙未進士任行人陞戶部郎
中立朝剛直知西安府改紹興嚴明愷弟有古循良
風民間有清廉到底之謠詔食二品俸再知建昌致

仕

胡鳳永樂乙未進士授主事多所建白以清約自勵
李璽耒陽人宣德庚戌進士拜監察御史出按浙江
陝西皆有能聲陞浙江參政正統己巳閩處變作提
兵分守寇平賜勅獎諭又勦安吉賊攻處寇皆有功
賜鈔帛晉雲南廉使省刑興學奏議賑荒秩滿民詣
闕奏留者五百餘人賜詔褒異進通議大夫因留任
凡十三年始告歸滇人立祠祀之

鄺彥譽臨武人英宗下詔徵賢以薦授四川布政司
檢校正統中遷錢塘知縣擢浙江按察僉事值歲大
荒浙西民所在強奪富家廩米官不能禁彥譽往以
便宜發官米賑之不足則轉貸於富家民遂安湖州
盜起處州賊亦相繼嘯聚彥譽皆討平之晉廣東廉
使兩粵徭獍倡亂從者萬數所過攻陷城邑暴師且
十年彥譽督海道兵事遂傳賊渠邵宣首獻闕下嶺
表平勞賜有加先是徭獍寇高廉瓊萬等郡士庶失

業至是彥譽檄有司修復廟學闢地為射圃並建義學令民間八歲以上咸受書為擇師儒仍領於有司
文教大行

譚珂安仁人由鄉薦通判思明府改順德以廉幹稱
嘗督納正保等六郡草價銀十萬三千兩抵大同羨
五千餘籍其數送行臺克明年草價數受獎異擢鎮
江府同知

李弘志安仁人正統中貢入太學為四川戎縣令邊

境畔亂弘志練兵設備率衆拒守伺間出勦擒其渠帥撫諭餘黨諸部歸復詔褒異之

以上舊通志

王詔楚紀衡陽人正統壬戌進士授禮科給事中己巳之變劾將臣失律請旌死事成化初拜都給事中天成衛指揮王輔甫弱寇邊將遣備寇西陲失律當斬詔言輔年少不當遣敗非其罪并其屬皆減死晉通政司參議勅視易州山廠進工部侍郎掌部事命浚運河上遣近臣勞於河上秩滿請老歸

賀讓衡山人知瀘州廉謹平恕陞思州知府去之日
瀘人攀號滿路為立仁政坊守思州又多惠政民獠
具安今廟食于思州

劉吳衡陽人天順丁丑進士拜兵科給事中彈劾無
所避成化中上疏及宮禁事上震怒奪職直聲震中
外

謝懋衡陽人任鳳陽府通判時中官守備地方多黷
貨擾民思上疏言中官啣命而出政以賄成所從弟

姪廝養如虎而翼要挾有司侵漁地利民不聊生致傷和氣旱澇疊至乞聽御史繩以三尺庶民生不至沾危疏入謫寧夏衛經歷後轉重慶同知

陳經臨武人以進士知內江縣值歲歉民逃移者半經加意撫牧民皆還定以薦擢監察御史有中貴用事經疏列其罪外調知榮經縣陞知雅州改東平先是河決張秋口修築隄工隨潰改委經等越歲告成晉陝西按察僉事分鎮寧夏

謝文正恩之子以貢仕大同衛經歷疏白李蓮朱震等之寃宜加褒恤又疏禦邊之策在守與戰戰之利一守之利四區畫甚詳轉宿遷知縣又疏論巡按御史王英多用役夫因請嚴為限制士論韙之

謝文祥耒陽人成化丙戌進士選庶吉士拜監察御史追論大學士陳文不法事不宜謚莊靖又極諫上元張燈劾禮部尚書姚夔濫舉御史張岐逮下詔獄科臣白昂等疏救謫南陵丞文祥與羅倫莊景友善

性皆骨鯁世號三剛仲子訥弘治乙丑進士官給事中逆瑾專恣發其奸武宗嘉其讜直瑾誅擢工科都給事中

吳紀衡山人成化戊戌進士授兵部主事歷員外郎中忤逆瑾出為浙江參政捐俸二千餘金貯庫以備賑濟所著有遺清軒稿

歐陽涵安仁人成化庚子領鄉薦知儀真縣以清節著稱有鶴來之瑞建來鶴亭嘗修學浚井獲一甕貯

清水雙鯉躍其中涵喜曰此士子科名兆也明年果
二士聯捷又以邑衝要奏乞薄賦均役民懷其惠善
剖疑獄他邑亦多取決

陳詔安仁人成化間以明經授桐鄉丞民病疫俗尚
禱祀詔力禁之捐俸購醫藥民賴以生擢知河南鹿
縣糧長並為侵盜詔按得其情集百金暮夜祈免詔
並發之致其罪

黃瓊安仁人成化間以貢入太學令藁城廉靖有為

勤於課士常稱石瑤石玠之文曰此臺閣器也後並
貴顯滹沱河溢將灌城瓊登城祭拜水旋退後河道
竟徙離藁城十里許灤城高邑二縣饑民將為亂瓊
言於郡守發廩往賑助以俸金全活甚衆

李仁淦安仁人兄仁濬正德甲子舉人令永寧以廉
稱仁淦弘治丁卯舉人授溫州推官清操明慎會歲
歉盜滋起仁淦請發廩救賑民得生而盜亦息

以上
舊通

志

胡文璧楚紀耒陽人正德辛未進士授戶部主事歷
員外郎中改監察御史風裁峻厲擢太常少卿以慙
直出守鳳陽調保定陞天津兵備副使奏禁革皇庄
謫延安檢校嘉靖初起四川按察使卒予祭所著有
耒陽遺記

甯欽衡陽人正德丁卯領鄉薦仕諸暨教諭徵拜御
史武宗南巡抗疏請回鑾又奏革吉府魚稅第鎬自
號鐵山為處州別駕逮負課舉人某立於肺石時人

稱二甯云

劉明東臨武人年五十依父母左右一如嬰兒弟素弱不治生產為代其營殖以貢丞浙之東陽決疑獄修文廟委解南糧罷却補買諸費以子堯誨貴贈宮保兵部尚書

易泉衡陽人嘉靖壬午鄉試第一游南雍倡明聖賢之學仕鎮江司理晉戶部主事歷雲南按察僉事風裁凜凜請託賂遺一無所受引年歸里泉孝友性成

讓產與其弟永每晨起整衣冠竟日即溽暑不廢語
門人曰學在整齊嚴肅舍此無入手處

祝詠衡陽人嘉靖己丑進士歷戶兵科給事中幸臣
請內府白糧代俸詠疏言不當擅損上供事竟寢星
變詔求言有黨執政者指事應為解詠應詔力詆其
奸又陳燒河套復屯田諸議出為太平知府巡撫子
貨馬虐民詠怒將執之被劾左遷再補贛州知府時
總督方立捕盜賞格有誣繫者詠謝盜賊不實立解

其獄遂引疾去職朝廷知其骨鯁擢四川副使備兵
松潘徧歷林崗撫視籌畫二年松潘無事晉陝西左
叅政乞歸有兩科奏疏蜀中藁祭奠禮式藏於家

以上

舊通

志

劉穩明一統志鄆人嘉靖丙辰進士除南京武選主
事累官南太僕少卿性沖粹於人無所忤屢立戰功
爵有令譽著山房漫藁家訓粵中政紀兩粵徃訓二
南漫藁易經蒙訓藏於家

廖汝恒衡陽人嘉靖戊午領鄉薦令湖口縣有惠政以養母解歸從李見羅徐匡嶽討究性理嘗購義田贍族又葺館城南為講學地監司鄧雲霄雅相引重時有兄弟訟產者命就質汝恒告以至性大義兄弟感泣翁和如初著五經新編為人懿則諸書

鄺世彥臨武人以貢判楚雄府時武定賊鳳繼祖叛朝議討之世彥居中謀畫捷聞勅賜金幣晉楚雄同知署尋甸府事擒賊首鳳歷再膺欽賞虎噬人禱之

明日虎死於道當事為勒異政碑所至興建學宮士
民立祠祀之

何天祿桂陽州人由舉人令增城廉直不苛所著有
艮所詩集

陳尚伊桂陽州人隆慶二年進士初令永豐累陞至
江西叅政歷任有政績致仕歸卒桂陽自明初以十
八灘險免漕運徵改折銀七百餘兩萬歷中復運漢
川南糧二千餘石民病之後仍免運實自尚伊白其

事云

伍讓衡陽人隆慶辛未進士授中書舍人遷刑部員外
歷河南叅議汝南馬鞍山賊餘黨負嵎猖獗讓出奇
兵捕之斬俘畧盡轉南贛副使致仕讓嗜學工詞翰
孝事繼母友愛諸弟有鏡湘館集

曾鳳儀耒陽人萬歷癸未進士歷儀曹郎與岳元聲
顧允成等同倡議建儲尋致仕與諸同志建集賢書
院於衡嶽祀昌黎鄴侯清獻濂溪四君子會晦菴南

軒祠火鳳儀復迎兩主合祀書院中又購田紀石以資講肄晚頗怡情釋典注楞嚴法華圓覺楞伽諸經名曰宗通卒年八十餘

康時升衡山人萬厯戊子領鄉薦授惠來令有獄寃滯十年立為洗雪邑濱海番船輻集舊為利藪第治其爭訟無秋毫染赤脚兵騷動郡邑聞時升廉吏各解去丁內艱歸時升湛深理學歸於有用常曰今天下有勢位文章者皆轉瞬盡耳惟德與義實堪不朽

有懷德軒集

以上舊通志

周廷參三楚文獻錄衡山人父元昌嘗著易說廷參登萬厯乙未進士令海寧拊循休息暇則集民之勇者部勒練之以防倭警後倭果突起海上廷參先遣其健而黠者入倭營誘之先渡將登岸出精兵邀擊之倭方錯愕先所遣入倭營者復為內應倭遂潰值早晚禱七夜傷其膝血流至足已而大雨會朝廷用兵征播詔取運夫民驚避廷參給資遣之謂汝等安

行無慮不兩月即奏凱矣已而果然丁外艱歸民號
哭罷市送至千餘里外以哀毀卒

康元積衡山人與兄元和同舉萬厯甲午鄉試元積
辛丑進士官太常博士上保秦疏侃侃數千言深切
時政趙冢宰煥稱為當代一人將擢銓部力辭旋奉
欽取擬注吏科遽卒常以黃堡驛馬病民條議改罷
又倣安成條鞭例調停邑賦省若干緡鄉人賴之

陳宗契衡陽人萬厯辛丑進士選庶常改監察御史

疏論輔臣李廷機請誅陝西稅璫梁永正其蠱害按
臣徐懋恒之罪直聲震都下遣視漕運開濬泇河奉
詔按浙聞父疾遽歸起督畿輔學政以待母辭再起
歷太常正卿魏忠賢擅政欲宗契附已宗契乞終養
以歸懷宗初立詔以兵部右侍郎起用未間命卒有
詩文集二十卷行世

徐孔第桂陽州人以上舍生謁選參軍閩藩督課沙
埕減織雜課二千金有翼璫而處者以法殲之巨賈

十四人風急泊舟未經沙埕符驗監司執為盜沒其
貨擬重辟孔第力脫之遷傳益藩嚴整循禮王敬憚
之奉旨均宗人祿裁節二萬有奇歲賓興王出遊諸
生有犯王路者校擊之死諸生大譁燬學舍將攻王
宮學使者諭之不退孔第與溫語立解疏上諸生惴
惴以金祈免正色麾之事亦寢

吳國瑞衡陽人以天啟覃恩貢太學中乙榜判徽州
府降補閩省理問轉秦檢校以廉惠聞薦補岐山令

告歸所著有思齋錄歸田集子汝潤登賢書

以上舊通志

管大成天啟辛酉舉人授福建通判奉檄調餉赴都
至涿州聞警星夜疾馳以間得入都城奉旨擢補臺
省官以不謁權貴遂不果用

府志

皇清廖聯翼衡陽人順治己亥進士知孟津縣到官即
廉得奸宄伏法縣人畏服值旱蝗捐俸賑粥全活
甚衆陞內閣中書舍人去官日士民泣送

鄒世任鄆縣人歲貢生定周之子康熙甲戌進士

知徵寧縣悉革陋規二千餘兩在官無宿儲行取擢吏部主事遷文選司員外郎以廉謹稱丁酉戊戌分校兩闈以病乞休年七十一卒

唐崇勳衡山人康熙辛酉舉人知榆社縣改靖安歲饑輒發倉粟以賑不及待符下曰苟活民雖違例被譴甘之有盜殺寺僧劫其貲捕卒得寺中遺扇有姓名舊寺中傭也繫之至崇勳訊得其枉人惑之後獲盜隣縣界中則遺扇姓名也一縣稱神

明行取擢戶部主事遷貧外郎以病告歸

華士捷衡陽人康熙癸酉舉人知廣平縣廣平多水患士捷開濬河渠邑居用寧上官察其清勤屢檄攝他縣篆在任十七年卒

唐傳鈺衡陽人雍正甲辰進士知樂清縣修城浚河以固疏風氣建王梅溪書院以興厲文教其家瘠田數畝貧窶如故以勞卒官

湖廣通志卷五十五